



Asii Chemnitz Narup  
 Inuit Ataqatigiit  
 /Maani

**"Naalagaaffiit Peqatigiit Nunat Inoqqaavisa Piginnaatitaaffi Pillugit Nalunaarutaat"-nut tunngatillugu § 36, imm. 1 naapertorlugu apeqqutigisannut 13. december 2006-imeersunut akissutit.**

Asasara Asii Chemnitz Narup,

Naalakkersuisut, Danmarkip aamma NGO-t, taamatuttaaq ICC-p nunap inoqqaavisa piginnaatitaaffi pillugit Naalagaaffiit Peqatigiit sulinerannut peqataanerat pillugu apeqquterpaalunnik nassiuissaqarputit.

Apeqquteqarninnut aallaavigaat Naalagaaffiit Peqatigiit, naatsorsuutigineqartutut neriuutigineqartutullu, Naalagaaffiit Peqatigiit Ataatsimeersuarnerani nalunaarutissaq ataatsimiititaliat pingajuanni inuit piginnaatitaaffiinik sulialimmi oqaluuserineqarmat, Naalagaaffiit Peqatigiit Nunat Inoqqaavisa Piginnaatitaaffi Pillugit Nalunaarutissaat akuersissutigingimmassuk. Aallaqqaasiullugu ingerlaaseq taanna pingaarutilik killiffissiussavara:

Namminersornerullutik Oqartussat Nalunaarutissap suliarineqarnerani isumaqatigiinniutigineqarneranilu tamarmi suleqataallutik peqataapput. Namminersornerullutik Oqartussat Naalakkersuisut imaluunniit Nunanut Allanut Pisortaqarfik sinniisoralugit danskit aallartitaanni naalakkersuisutut qaffasissuseqarlutik peqataapput. ICC Indigenous Peoples Organisationitut (IPO) NGO-tut qaffasissuseqarluni peqataavoq. Inuit Circumpolar Council (ICC) Naalagaaffiit Peqatigiit Aningaasaqarnermut Inooqatigiinnermullu Siunnersuisoqatigiivisa (ECOSOC) ataanni NGO-tut immikkut oqaaseqarsinnaatitaalluni inissismavok.

Nalunaarut maannakkut Nalunaarutissamik suleqatigiit ("Working Group established in accordance with Commission on Human Rights resolution 1995/32 of 3 March 1995," aammattaaq taagorneqartut open-ended inter-sessional working group, imaluunniit working group on the draft United Nations deklaration on the rights of indigenous peoples) siulittaasuannit suliarineqartumik naaperiaanernik oqaasertaqarluni saqqummerpoq.

Nalunaarutissap oqaasertassai nunap inoqqaavisa kissaateqarnerat malillugu aamma nunarsuarmi nunap inoqqaavinit, naalagaaffiinnit, NGO-nit ilisimatuunillu pimoorullugu sunniiniareernerisigut Naalagaaffiit Peqatigiit Inuit Piginnaatitaaffi Pillugit Siunnersuisoqatigiivisa pilersinneqarlaat Genevemi ukioq manna ulloq 29. junimi inissitsiterniarlutik ataatsimiinneranni akuersissutigineqarput.

22. december 2006  
 J.Nr. : 09.53-01/09.54  
 P.O. Box 1037  
 DK-3900 Nuuk  
 Oq/tel +299 34 50 00  
 Fax +299 32 46 14  
 Oed@gh.gl  
 www.nanoq.gl

Nalunaarutissaq tamatuma kingornatigut Naalagaaffiit Peqatigiit ataatsimeersuarneranni Inuit Piginnaatitaaffii Pillugit Siunnersuisoqatigiit nalunaarusiaanni aalajangiiffigisassatut missingiusiaalluni suliarineqartussaavoq.

Aallaqqaataanit paasinarsivoq arlalinnik pissuteqartumik suliaq ilungersunartuussasoq. Siullermik aallaqqaammut Inuit Piginnaatitaaffii Pillugit Ataatsimiitaliarsup Nalagaaffiit Peqatigiinni qaffasinnerusunngorlugu maannakkut Inuit Piginnaatitaaffii Pillugit Siunnersuisoqatigiinnut qaffallugu atorunnaarsinnejarnissaa akerlerineqangaatsiarsimavoq. Aappassaannik nalagaaffippaalussuit isumaqarput Nalunaarutissap oqaasertassai sunniuteqarpallaassasut. Ukioq ataaseq qaangiutsinnagu sulineq naammassineqassasoq piumasaqaatigeriarlugu maannakkut qanoq pineqarnissaa isumaqatigiinniarnerit ingerlateqqippaat imaluunniit akuersissutigineqarnissaa akornusernialerlugu.

Naalagaaffiit Peqatigiit 61-issaannik ataatsimeersuarnerata ammarneqarnerani pingaernerutitat oqallisigineqarneranni ministerit sapaatit akunneranni ataatsimiinnerannut peqataavunga siunertarerpiarlugu Nalunaarutissap ataatsimeersuarnermi akuersissutigitinnissaanut periusissat oqallisigineqarnissaat. Naalagaaffiit uatsitut isumallit assigiinngitsut oqaloqatigisarpagut sapinngisatsinnillu taassuma akuersissutigineqarnissaanut soqtiginnineq annertusarniarlugu tapserneqarnissaalu anguniarlugit.

Assersuutigalugu taasinnaavara Mexicop Cabinetianut ilaasortamik, Xóchitl Galvéz Ruizimik, Mexicop Nunap Inoqqaavinut Nuna Tamakkerlugu Ataatsimiitaliarsuanut pisortaanerusumik, kingunissaqarluartumik ataatsimeeqateqartarama. Aammattaaq Perumiut Nunat tamalaat nalunaarutissaannut suleqatigiissitamut siulittaasoq maannakkullu Nalunaarutip oqaasertaanik allattoq, Luis-Enrique Chavez ataatsimeeqatigaara. Mexico Perulu nunat isumaqatigisatik peqatigalugit soorlu nunat avannarliit EU-rmiullu Nalunaarutissap suliarineqarnerani assut pingaaruteqarlutik sulisimapput maannakkut New Yorkimi pisortatigoortuunngitsumik oqaloqatigiittarnertigut nanginneqartumik.

Tamakku kinguneraat soorlu aallaqqaataani oqaatigigit ulloq 28. novembarimi Nalunaarutissap ajuusaarnaraluartumik akuersissutigineqanngitsoornearnik. Nalunaarutissap akuersissutigineqarnissaanut pisariitsumik periaaseqartoqarnissaanut aalajangiisoqarnissaanut Danmarki Kalaallit Nunaallu siunnersuuteqartunut ilaagaluartut ilaatigut CANZAUS-nunanit (Canada, New Zealand, Australien aamma USA-mit) annertuumik sunniuteqaqataasoqarneratigut Naalagaaffiit Peqatigiinni afrikamiut aallartitaasa ingerlaaseq allamut saatissallugu iluatsippaat aalajangiinissamut siunnersummut matuma siuliini taaneqartumut qaatigut sunniuteqassagunangitsumik isikkulimmik allangortitsisoqarnissaanik siunnersuuteqarnermikkut. Allangortitsinissamik siunnersuutip kinguneraa akuersissuteqarnissap kinguartinneqarnera naalagaaffiit taassuminnga misissuilluarnerunissaat siunertaralugu. Allatut oqaatigalugu nunat qulartut iluatsippaat kissaatigisamik anguniarsinnaanissaannut piffissaqalernissartik,

tassalu Nalunaarutissap oqaasertaasa isumaqatigiinniutigineqaqqinnissaannut ammaassassinissaq. Siunertaraat naaperiarfittut oqaasertai missingiummut siullermut naleeqiullugit naalagaaffit kissaatigisaannut amerlaqisunut naaperiaaffiusut suli qasunganerulersinneqassasut.

Naalagaaffit Peqatigiinni Nalunaarutissaq akuersissutigitinniarlugu sulissutigineqarturopoq. Danmarkip ilaatigut Namminersornerullutik Oqartussat aqqutigalugit "Indigenous Caucus" (nunap inoqqaavisa ataatsimoorlutik nipaat) suleqatigilluinnarpaa, taamatuttaaq ICC NGO-lu, soorlu assersuutigalugu IWGIA, suleqataalluni aningaasalersuillunil ingerlaatsimi nunap inoqqaavinik tapersersuisoq. Peqatigitillugu Nalunaarutissap akuersissutigineqarnissaa pillugu aalajangersagassatut missingiummut siunnersuuteqaqataasut – Mexicomit allanillu siuttuuffigineqartut - ataqatigiissaarippuit afrikamioqatigiit pisortatigoortuunngitsumik oqaloqatigineqartarnissaat eqqarsaatigalugu.

**1) "Ukioq Naalakkersuisut aamma Naalagaaffit Peqatigiit Nunap Inoqqaavinut Ataavartumik Suleqatigiiffiata akornanni peqatigiinnissamik isumaqatigiissutissanut tunngasut oqallisigineqarput, suliassatut eqqartorneqartut suna inerneraat?"**

Peqatigiittarnerit pillugit nunani tamalaani immikkut ilisimasalinnik isumasioqatigiissitsineq Naalakkersuisut Nunap Inoqqaavinut Ataavartumik Oqallitarfik suleqatigalugu aaqqissuussaat assut iluatsitsiviuvooq. Isumasioqatigiissitsineq Danidamit aamma Namminersornerullutik Oqartussanit aningaasaliivigineqarpoq ICC-lu peqatigalugu ingerlanneqarluni. Isumasioqatigiinneq peqatigitillugu Naalagaaffit Peqatigiit qullersaasa Johannesburgimi 2002-mi piujuartitsinissamik tunngaveqarluni ingeriartortitsinissaq pillugu ataatsimiinnerannit Danskit-kalaallit peqatigiinnissamut sulissutiginninnerannut malitseqartitsineruvoq.

Isumasioqatigiissitsinikkut siunertaavoq immikkut ilisimasallit saqqummiussaat tunngavigalugit peqatigeeriaatsit assigiinngitsunik ilusillit pillugit kaammattuusiortoqarnissaa soorlu Ataavartumik Suleqatigiiffiup sulineranut taamatullu Naalagaaffit Peqatigiit Nunarsuarmi Nunap Inoqqaavinut Ukiunut Qulikkaanut Ukorititaasa Aappaanni suliassanik suussusilersuinermut ilangussassanik.

Peqatigiinnissamik aaqqissuussisarneq najukkani, nunap immikkoortuini nunarsuarmilu suleqatigiinnermi akuerisaalluni atorneqalersimavoq. Peqatigiinnissamik pilersitsineq ineriartortitsinerlu aammattaaq Ataavartumik Suleqatigiiffimmi sulinermi tunngaviuvoq tassanimi suliassaammata nunap inoqqaavisa, naalakkersuisut, naalagaaffit akornanni soqutigisaqaqatigiiffit, NGO-t Naalagaaffit Peqatigiillu akornanni ataatsimut isiginnilluni ataqatigiissaarinerup

patajaallisarneqarnissaa      nunarsuarmi      nunap      inoqqaavisa      atugarisaat  
pitsangorsarniarlugit.

Nuummi immikkut ilisimasallit isumasioqatigiinnerannit imaqarniliaq tallimassaannik ataatsimeeqattaarnissanut atortussat ilaattut, Naalagaaffiit Peqatigiinni oqaatsit arfinillit atorneqartut atorlugit, Naalagaaffiit Peqatigiinni pisortatigoortumik allagaatitut ilanngunneqarpoq. Isumasioqatigiinneq Naalagaaffiit Peqatigiit Nunarsuarmi Nunap Inoqqaavinut Ukiuni Qulini Ukiorititaasa aappaannik piviusunngortitsinermut ilaavoq taamaalillunilu Nunanut Allanut Pisortaqrifiup Kalaallit Nunaat Danmarkilu sinnerlugit taanna pillugu oqaluuserisassangortitsinerani oqalugiaatigineqarluni.

Siuunertarineqartoq alla tassaavoq Ataavartumik Suleqatigiiffiup ilaasortaasa nunap inoqqaavisa najugaqarfisa ilaanni – tassalu New Yorkimi Naalagaaffiit Peqatigiit allaffeqarfissuata avataani - aatsaat siullermeerlutik piareersarniarlutik ataatsimiissinnaanissaannut tunngavissiinissaq.

Inuit 79-it missaat nunanit 30-t missaanneersuneersut ataatsimiinnissat piareersarnerannut ataatsimiinnernullu peqataapput. Taakkunangna Danidap Namminersornerullutik Oqartussallu ataatsimeersuarnermut aningaasartuutit nerisaqarnerlu peqataasunut tamanut akilerpaat taamatullu angalanernut ineqarnernullu aningaasartuutit ullormusiallu peqataasunut 28-nut, Ataavartumik Suleqatigiiffiup Allattoqarfia oqalutsillu ilanngullugit. Nunat inoqqaavisa immikkut ilisimasalittaasa saniatigut Danidap tapersersuineratigut periarfissaqalerpoq naalakkersuisuneersut ataasiakkaat peqataanissaasa aningaasaliiviginissaat, pingartumik nunanit ineriertuneersut, taakku ileqqorimmassuk nunap inoqqaavisa atugarisaat soqutigisarnagit paaserusussanagilluunniit.

Tamatumunnga assersutissaavoq Indonesia New Yorkimi Ataavartumik Suleqatigiiffiup suliarisartagaanut sakkortuumik isornartorsiuisartoq qularutiginnittarlunilu, taamaakkaluartorli ataatsimik ataatsimeeqataajartortsilluni ataatsimiinnermut kajumilluarluni soqutiginnillunilu peqataasumik. Isumasioqatigiittooqarpoq equeersimaartumik sukangasuumillu kalaallinit aqunneqartumik pissuserissaarfiulluartumillu.

Isumasioqatigiinneq tusagassiorunit malinnaavigineqarluarpoq. Tusagassiorut Kalaallit Nunaanneersut Kalaallit Nunaata Radioaneersut TV-aneersullu kiisalu Sermitsiameersut isumasioqatigiinneq aamma Ataavartumik Suleqatigiiffiup piareersaataasumik ataatsimiinnera malinnaavigaat. Nutaarsiassaleriffinnut toqqortassanillu assiliisoqangaatsiarpoq. Tamakku saniatigut tusagassiorut arlallit ilaatigut Kalaallit Nunaata Radioani Radioaviisimeersut alaatsinaatsutut isumasioqatigiinnermut peqataapput.

ICC-p Katuami aaqqissuussinermi kulturimut tunngasut aaqqissuuppai Inatsartunit aningaasalersorneqartut Inatsisartut ukiuunerani ataatsimiinnerata ammarneqarnera malunnartinniarluguttaaq.

Isumasioqatigiinnerup iluatsilluarneranut pissutaasut pingaernerpaat tassaapput misilittakkanik paarlasseqatigiinneq aamma uppernarsaasersuineq. Tulliullugu Ataavartumik Suleqatigiiffik Allattoqarfillu isumaqatigiippuit Ataavartumik Suleqatigiiffiup nunat assiginngitsut nunallu inoqqaavisa inuuniarnerminni atugarisaannut ataatsimut isigalugu ilisimasaqalernissaa pingaaruteqartoq. Tamatuma saniatigut pingaaruteqarpoq nunap inoqqaavisa sinnisaasa naalakkersuisullu sinnisaasa akornanni ataatsimoorluni suleqatigiissinnaanerup nukittorsarneqarnissaa, New Yorkimimi Naalagaaffit Peqatigiit allaffeqarfissuanni ataatsimiinnerni taamaaliortoqartanngimmat.

Taamaalluni Kalaallit Nunaata Nuummi piareersaataasumik ataatsimiitsisimanera pissutigalugu maannakkut Kinap Ataavartumik Suleqatigiiffimmut 2007-imi arfinilissaannik ataatsimeeqattaalinnginnermi piareersaataasumik ataatsimiitsineranut. Tamanna nammineq ersersitsivoq annertuumik atorfissaqartinneqaqisumillu naalakkersuinermi pingaarutilimmik iluatsittoqarsimaneranut peqatigitillugulu Ataavartumik Suleqatigiiffiup siunissami inissisimanissaa nukittorsarlu. Kinap ilisimaneqaatigaa nunap inoqqaavinut akuersaanngitsuunini, Kinami nunap inoqqaavi amerlaqisut ilanggullugit.

Rusland Sydafrikalu Ataavartumik Suleqatigiiffimmut piareersaataasumik ataatsimiitsisarnissaminut soqutiginninnermik takutitsipputtaaq. Qularutissaanngilaq Namminersornerullutik Oqartussat ICC peqatigalugu Ataavartumik Suleqatigiiffiup sulinerani pingaarutilimmik maligassiilliuarsimassasut.

Naalakkersuisut iluatsilluartutut pitsasumillu maluginiagassatut isigaat nunat angisuut taakkutut ittu Ataavartumik Suleqatigiiffiup sulineranut tapersersuinerat.

Saniatiguttaaq pingaarutilimmik pissarsissutaavoq Inatsisartut Nunanut Allanut Sillimaniarnermullu Ataatsimiitaliaat Ataavartumik Suleqatigiiffimik pissarsiffiulluartumik ataatsimeeqateqarnerat. Tamatuma ilaatigut kinguneraa Ataatsimiitaliap Ataavartumik Suleqatigiiffiup New Yorkimi tallimassaannik ataatsimiinneranut peqataanera.

Isumasioqatigiinnerut peqataasuttaaq periarfissinneqarput Inatsisartunut ilaasortanik naapitsinissaminut. Tamakku saniatigut Ataavartumik Suleqatigiiffiup ilaasortai periarfissinneqarput tamatuma kingornatigut pisortatiguunngikkaluamik Naalakkersuisunut ilaasortanik ataatsimeeqateqarnissaminut.

Kiisalu nunanit tamalaaneersut immikkut ilisimasallit isumasioqatigiinnerannut Ataavartumillu Suleqatigiiffiup ataatsimiinneranut atatillugu Nunap Inoqqaavisa Piginnaatitaaffii Pillugit Nalunaarutissaq siuartinniarlu iliuusissat aamma nunap inoqqaavisa Naalagaaffit Peqatigiit Inuit Piginnaatitaaffiinut Siunnersuisoqatigiivinut peqataanissaat oqallisigissallugit periarfissarsisoqarpoq.

**2) "Kunngeqarfik Danmark Kalaallit Nunaat sinnerlugu**  
**Naalagaaffiit Peqatigiinnut ilaasortaavoq; taamaakkaluartoq**  
**nunap inoqqaavisa piginnaatitaaffii pillugit nalunaarutissap**  
**suliarineqarnerani ammasumik suleqatigiissitat**  
**ataatsimiinneranni katersuuttarnerit akornanni sulinermi**  
**(Open-ended intersessional Working Group on a draft United**  
**Nations declaration on the rights of indigenous peoples)**  
**toqqaannartumik peqataasanngilaq, tassami Østrigi**  
**isummersuisussatut oqaaseqartartutullu EU-mi nunat**  
**sinnerlugit peqataammat.** a) **Naalagaaffiit Peqatigiit Nunap**  
**Inoqqaavinut Ataavartumik Suleqatigiiffiannut tunngatillugu**  
**akisussaalluni danskit ministeriata Namminersornerullutik**  
**Oqartussallu pissusiviusutigut suleqatigiinnerat qanoq**  
**aaqqissuussaava – nunarput sinnerlugu EU-p sassartutut**  
**inisisimanera akuerineqartuaannassava? b) Siunissami**  
**Naalagaaffiit Peqatigiit Nunap Inoqqaavinut Ataavartumik**  
**Suleqatigiiffiannik suleqateqarnerup ilusilersugaanissaanut**  
**Naalakkersuisut sunik siunertaqarpat?"**

Soorlu aallaqqaasiinermi oqaatigineqareersoq Namminersornerullutik Oqartussat Nunanut Allanut Pisortaqarfiat Naalagaaffiit Peqatigiit Nunap Inoqqaavinut Piginnaatitaaffii Pillugit Nalunaarusiaanut qanittumik pitsaasumillu Danmarki suleqatigalugu Nunanut Allanut Ministeriaqarfimmi aamma Naalagaaffiit Peqatigiiffianut sinnisoqarfii Genèvemi New Yorkimilu inisisimasut peqatigalugit suleqataavoq.

Taamatut pitsaasumik suleqatigiinneq Naalagaaffiit Peqatigiit Nunap Inoqqaavisa Atugarisaannut Ataavartumik Suleqatigiiffianni sulinermuttaaq sunniuteqarpoq, tamanna matuma siuliini aamma Naalagaaffiit Peqatigiinnut tunngatillugu suliassani allani takuneqarsinnaalluni.

Apeqqutivit immikkoortuata aappaani suna pinerit nalorninalaarpooq. Oqaatigisinnaavarali Danmarki Kalaallit Nunaallu Genevemi Nalunaarutissap Inuit Piginnaatitaaffii Pillugit Siunnersuisoqatigiinni akuersissutigineqannginnerani isumaqatigiinniarnerni ukiakkullu New Yorkimi sunniiniarluni ilungersuullugu suleqataallutik peqataasarmata.

Apeqqutit ilaannut a)-mut tunngatillugu, soorlu maani nassuaammi aammattaaq atuarneqarsinnaasoq, erseqqissaannarsinnaavara Danmarkimik suleqateqarnerput pitsaasummat. Nunap inoqqaavisa piginnaatitaaffii danskit naalakkersuisuinit

pingaartinneqarput, tassami taakku 1994-imili Namminersornerullutik Oqartussat suleqatigalugit nunarsuarmi naalagaaffit siullit ilaattut nunap inoqqaavinut tapersiiniarlutik periusissanik suliaqarsimammata – periutsit tamatuma kingornatigut allanut kajungilersitsisimasut.

Nunarsuarmi suleqatigiiffimi Naalagaaffit Peqatigiittut ittumi sulissagaanni allanik peqatissarsiortariaqarpoq, taamaalilluni suliani sallitukkusutani nukittunerusinnaajumalluni. Soqutigisatsinnut tunngatillugu EU-mi isumaqatigiittoqarsinnaappat – tamatumani nunap inoqqaavisa piginnaatitaaffiisa siuarsarneqarnissaat eqqarsaatigalugu – soorunalimi EU-p ataatsimoorluni isummernera nunanik 25-nik ilaasortaqarnini nakooqutigalugu Danmarkip Kalaallit Nunaatalu kisimiinneranninngarnit imaluunniit nunanik avannarlernik tallimaasunit peqateqarnermiit annertunerusumik sunniuteqarnerungaassaaq.

Apeqqutivit ilaannut b)-mut tunngatillugu oqaatigisinnaavara maannakkuugallartoq Naalakkersuisut Naalagaaffit Peqatigiit Ataavartumik Suleqatigiiffita sulineranut peqataanertik allannortinnissaanut pissutissaqanngimmata. Ataavartumik Suleqatigiiffiup sulinera ineriartortinneqartuarpoq. Namminersornerullutik Oqartussat sulinermut tassunga annertuumik ikuuttareerput, Suleqatigiiffiup pilersinneqarneranut ukiuinilu siullerni. Ilaatigut Danmarki Kalaallit Nunaallu suliniuteqarsimapput nunat killernik taaneqartartut maannakkut piffissani marlunni inuit inuttut kulturikkullu oqaluttuarisaanerannik ilisimasaqarluartumit nunallu inoqqaavinik immikkut ilisimasalimmit, tassalu Ida Nicolaisen-imit, nunat avannarliit sinnerlugit qinigaasumit sinnisoqartarsimanerannut. ICC-mut kalaallit ilaasortaatitaat Aqqaluk Lynge issittormiut sinnerlugit toqqagaavoq Samerådet aamma ICC paarlakaajaallugit ilaasortaalluni.

**3) "Kattuffiit/suleqatigiiffiit naalakkersuisunut atanngitsut (NGO-t) minnerunngitsumillu ICC nunarput issittormiullu sinnerlugit imaannaanngitsumik suliaqarsimapput nunap inoqqaavisa nunarsuarmioqatigiinnermi soqutigisaat siuarsarniarlugit illersorniarlugillu. Nukissat suut (sulisoqarnermut aningaasalersuinermullu tunngasut) Naalakkersuisut atugassanngortinniarpaat oqaluttuarisaanermut tunngatillugu sulinermi tessani pingaarutilimmi nalunaarutissap oqaasertassai kimeeruppallaartinnagut angusaqartoqarsinnaaqquillugu? "**

Aningaasanut Inatsimmi atuarneqarsinnaavoq ICC ukiumut 5 mio. koruuninik Nunap Karsianiit tapiissuteqarfingineqartartoq. Tapiissuteqartarnermut aningaasat inissismaffiat taanna maannakkut Inatsisartut ataanniippoq. Naalakkersuisut isumaqarput aningaasaliinermi oqaasertaliussat tunngavigalugit ICC nammineerluni aningaasanik taakkuninnga tulleriaarisassasoq. Illassutitut

oqaatigineqarsinnaavoq ICC Naalagaaffiit Peqatigiinni sulinerminut Nunanut allanut ministeriaqarfimmit IWGIA-millu tapiissuteqarfingineqartarmat. Tamakku saniatigut ICC Avatangiisnut ministeriaqarfimmit issittormiut suleqatigiinnerannut avatangiisinullu tunngasunik suliassanut tapiissuteqarfingineqartarpoq. Kiisalu ICC Nunanut Allanut Pisortaqarfiup nunani tamalaani suliassanut tapiissuteqartarnernut kontoanit suliassanut assigiinngitsunut qinnuteqallattaasarpoq tapiissuteqarffigineqartarlunilu.

Ikinngutinnersumik inuulluaqqusillunga  
Josef Motzfeldt  
Aningaasanut Nunanullu Allanut Naalakkersuisoq